



Број/Број: 01/4-50-1-4-40/09
Сарајево/Sarajevo, 9.2.2009. godine

Z A P I S N I K

40. sjednice Komisije za finansije i budžet Predstavničkog doma Parlamentarne skupštine BiH

održane 4.2.2009., u vremenu od 9 do 9,40 sati.

Sjednici Komisije prisustvovali su članovi: Sadik Bahtić, Adem Huskić, Salko Sokolović, Bajazit Jašarević i Savo Erić.

Sjednici nisu prisustvovali: Lazar Prodanović, Velimir Jukić, Zlatko Lagumdžija i Drago Kalabić, članovi Komisije.

Sjednici su također prisustvovali: Fuad Kasumović, zamjenik ministra, i Josip Sočo, šef Odjela za vanjski dug, plan i analizu u Ministarstvu finansija i trezora BiH, Aida Osmanović, istraživač u Istraživačkom sektoru, i Zoran Brkić, viši stručni saradnik u Sektoru za odnose s javnošću PSBiH, te Željko Kosmajac, sekretar, i Muhameda Abaz, stručni saradnik pri Komisiji.

Za sjednicu je predložen sljedeći

DNEVNI RED

1. Razmatranje Prijedloga zakona o Garancijskom fondu, prva komisijska faza (predlagač: Vijeće ministara BiH);

Dnevni red usvojen je jednoglasno.

Ad.1. Razmatranje Prijedloga zakona o Garancijskom fondu, prva komisijska faza (predlagač: Vijeće ministara BiH)

I komisijska faza

U uvodu tačke dnevnog reda dato je obrazloženje Prijedloga zakona.

Josip Sočo, šef Odjela za vanjski dug, plan i analizu u Ministarstvu finansija i trezora BiH, obrazložio je Prijedlog zakona, kojim se predlaže osnivanje Garancijskog fonda radi osiguranja uslova za razvoj malih i srednjih preduzeća i poduzetnika u BiH. Jedan od najvećih problema poduzetništva u BiH, pogotovo preduzeća koja se nalaze u početnoj fazi razvoja, jeste nedostatak finansijskih sredstava i teškoće njihovog osiguravanja. S obzirom da su banke više okrenute finansiranju potrošnje, zbog povećanog rizika nedostatka sredstava osiguranja (hipoteka-nesređeno stanje u zemljišnim knjigama ili zalog-pravna nereguliranost), uslovi kreditiranja malih i srednjih preduzeća izrazito su nepovoljni (visoka kamatna stopa, bez grace perioda uz visoku proviziju poslovnih banaka), pa je neophodno da država putem Garancijskog fonda na sebe preuzme obavezu finansijske i nefinansijske podrške njihovog razvoja. Za donošenje ovog zakona

postoji ustavni osnov, a sredstva za njegovo provođenje u iznosu od 15 miliona KM osigurati će se iz državnog i entitetskih budžeta, te budžeta Brčko Distrikta BiH srazmjerno mogućnostima, dok se dodatna sredstva mogu osigurati iz donacija dodijeljenih BiH, supsidijarno prenesenih na upravljanje drugim pravnim subjektima, a koja se koriste po kreditnoj osnovi revolving tipa.

U toku rasprave pojasnio je način funkcioniranja Garancijskog fonda kroz izdavanje garancija, odnosno supergarancija bankama s ciljem osiguranja odobrenih kredita malim i srednjim preduzećima i poduzetnicima, te kroz primjer proizvodnje zečeva ukazao na potrebu njegovog postojanja. Odgovorio je da se donacija Japana u iznosu od 100.000.000 KM trojnim ugovorom državne i entitetskih vlada kreditno plasira na revolving osnovi, a za koju je Vlada Japana odobrila reprogram povrata sredstava za popunu protuvrijednosti fonda za četiri godine. Istakao je da bi procijenjena suma sredstava, koja bi se mogla vratiti pod upravu Vijeća ministara BiH u kratkom roku, mogla iznositi 150.000.000 KM, a što bi bio sastavni dio osnivačkog kapitala Garancijskog fonda.

Fuad Kasumović, zamjenik ministra finansija i trezora BiH, naveo je da u vrijeme recesije složen sistem vlasti u BiH ne omogućava da se napravi jedan paket mjera za teritoriju cijele zemlje. Stoga se Ministarstvo finansija i trezora BiH, u želji da podstakne ekonomski razvoj i afirmira tržišnu ekonomiju, odlučilo na predlaganje ovog zakona. Zakonom o zaduženju, dugu i garancijama BiH daje se garancija za kapitalne investicije, ali ne i za razvoj malih i srednjih preduzeća i privrede. Putem predloženog Garancijskog fonda malim i srednjim preduzećima i poljoprivrednicima omogućio bi se koleteral, jeftinija sredstva kod banaka putem raznih mehanizama fonda i druge pogodnosti.

Odgovorio je da Garancijski fond počiva na dobrovoljnim udruživanju sredstava, te da je u interesu svih dijelova BiH da učestvuju u njegovom kapitalu, kako bi preduzeća na njihovoj teritoriji radila.

Predsjedavajući Komisije naveo je da je ovo reformski zakon, koji treba podržati.

Adem Huskić istakao je da je ovo jedan od najboljih zakonskih prijedloga koji su upućeni u parlamentarnu proceduru, pohvalivši predlagačevu ideju i dajući mu punu podršku.

Savo Erić istakao je da je dobro da se misli na preduzeća i firme koje pune budžet. Interesiralo ga je funkcioniranje Garancijskog fonda na relaciji firma-banka-vraćanje i zaštita od eventualnih manipulacija.

Bajazit Jašarević naveo je da bezuslovno podržava zakonski prijedlog. Istakao je da se u obrazloženju zakonskog prijedloga-procjena finansijskih sredstava navodi donacija Japana u iznosu od 100.000.000 KM, malezijska donacija u iznosu od 12,1 mil USD, donacija Vlade Finske 2,6 miliona eura, te druga sredstva koja treba vratiti Vijeću ministara BiH na upravljanje, kao moguća sredstva za funkcioniranje Garancijskog fonda. Pitao je predlagača da li je realno da se Vijeću ministara BiH navedena sredstava vrata i stave u funkciju realizacije ovog zakona. Da li se fond može osnažiti iz preostalih budžetskih sredstava svake godine? Istakao je da je nerealno očekivati dobrovoljnu uplatu entitetskih budžetskih sredstava u Garancijski fond.

Glasanje o principima Prijedloga zakona

Nakon kraće rasprave i glasanja, članovi Komisije jednoglasno su podržali principe Prijedloga zakona o Garancijskom fondu u prvoj komisijskoj fazi, te ga uputili u daljnju parlamentarnu proceduru, čime je zaključena jedina tačka dnevnog reda.

Sekretar Komisije
Željko Kosmajac

Predsjedavajući Komisije
mr. ecc.sc. Sadik Bahtić